

hoer dienaar, die nu ende in toecomenden tiden in den voers. cloester woonen sullen ende alle hoer goede, die si nu ter tijt hebben of namaels vercrigen sullen, in onsen beschermenisse. Ende ombieden ende bevelen allen onsen dienstluden, bailjuwen, scouten, scepenen ende reekteren overal in onsen lande, dat si dat voers. cloester, persoonen, luden, dienaar ende goeden beschermen van allen onrechte, hinder ende moeijenisse jegens eenen yegelicken, wie hi waer. Ende waer dat sake dat yemaet hier en boven himluden voers. hinder of moeijenisse dede mit onbesceide aen horen persoonen of goeden, dat wilden wi verhalen ende corrigieren aen him als aen denghanen, die ons van onser heerlicheyt verminderen woude, behoudeliken ons ende onsen nacomelingen onsen dienst, die wi nu ter tijt hebben of hebben sullen op alsulcke goede als totte voers. cloester gegeven sijn of als men in toecomenden tidan daer toe gheven sal, in oirconde, enz. Gegeven in den Hage, 't sonnendages na Sinte Pouwelsdach Conversio anno XCII secundam cursum curiae nostrae.

BIJLAGE B.

Ratificatie, door Prins Willem van Oranje verleend tot de opdracht van de goederen, toebehoorende aan de kloosters der Oude en Nieuwe Nonnen te Amsterdam, ten behoeve van de beide gasthuizen aldaar, 6 December 1578.

Wilhelm bijder gratiën Gods Prince van Oraengiën, Grave van Nassau, van Catzenellenbogen, van Vianden, van Diets, van Bueren, etc., Heere ende Baron van Breda, van Diest, van Grimbergen, van Arlay, van Nozeroy, etc., Erffborch-

grave van Antwerpen ende van Besancon, Gouverneur van Brabant, Hollant, Zeelant, Westvrielandt ende Utrecht, Stadthouder-generael van den doirluchtighen Prince Matthias, bijder gratiën Gods Eertshertoghe van Oistenrijk, etc., Gouverneur ende Capiteyn-generael voor de Co.Ma^t. van desen Nederlanden, Allen denghenen die dese tegenwoirdige sullen zien off hooren lesen Saluyt, Wij hebben ontfangen d' ootmoedige remonstrancie, ons gepresenteert deur onsen seer lieven ende besunderen Burchmeesters ende Regeerders der stede van Amstelredamme vuyten naeme ende van wegghen die voochden van beyde de gasthuysen binnen derzelver stede, inhoudende hoe dat de voersz. gasthuysen overmits de voireden inlantschen crijch soe zeer verarmt sijn, dattet niet mogelijk en is de crancken aldaer in 't geheele off in deele te kunnen onderhouden sonder met eenige middelen daertoe dienende te wesen geholpen ende versien, omme 'twelcke emmers tegens den toecomenden tijt te moghen doen, hebben de voirsz. voochden met wille ende advijs van den voirsz. regeerders bij vrijwillich accord ende overcomste geaccordeert metten voochden ende allen den conventualen van de Oude ende Nieuwe Nonnen binnen derselver stede op het transport van allen heuren goederen tot wat plaetse deselve oick gelegen sullen mogen sijn, op al sulcke alimentacie ende lijfpensioen, jae veel meerder als haerlieder incompten souden moghen bedraeghen, gelijk ons vuyte autenticque copiën van den transport ende opdracht van dien genoechsaem gebleken is, ende hoewel met redenen op 't voirsz. transport nyemant en soude moghen ofte behooren te spreken, ofte daer tegens te comen, noch yet te attenteren, als vrijwillich ende bij denghenen gedaen, die naer luyt het negentiende article van de Satisfactie derzelver stede in allen haeren goederen te vollen gestelt zijnde, zulex mochten doen, nochtans tot beter versekerheyte van dien ende om ten eeuwigen daghen 'tselve te mogen vast ende van weerden

blijven, hebben de voirsz. Burchmeesters ende Regeerders der stede van Aemstelredamme vuyten naeme van den voirsz. voochden van beyde de gasthuysen aldaer aen ons oitmoedelijken versocht, hun 't voirsz. transport te willen confirmeren ende corroboreren, om alle questiën ende swaricheden in toecomenden tijden te verhinderen. Daerom soe ist, dat wij 'tgene voirscreven is aengemerct, ende daer neffens gevisiteert hebbende diversche openbaere acten dies aengaende gepasseert, mitsgaders daerenboven geïnformeert wesende, dat de voirsz. Burchmeesters ende Regeerders haere gerechticheyt totten fabriicken ende getimmert der voirsz. nonnen-conventen, hemlieden vuyt crachte van zekere resolutie van den Generalen Staten van Hollant competerende, den voirsz. gasthuysen hebben gecedeert ende overgelaeten, hebben geconfermeert ende gecorroboereert, confirmeren ende corroboreren mits desen 't voirs. transport ende opdracht bij den voochden ende allen den conventualen van de Oude ende Nyeuwe Nonnen-conventen binnen derzelver stede ten profijte van beyde de gasthuysen aldaer, in der voegen als boven gedaen, mits dat d' alimentacie ende lijfpensioen gepresteert zij, vuytwijsende 't inhouden van het transport der voirsz. conventen-goederen, Ordonnerende ende bevelende wel expresselicken allen officieren, justicieren, wethouderen ende anderen, dien desen soude moghen eenichsins aengaen, dat zij partien laeten respectivelicken 't inhouden deser genieten sonder eenich belet, contradictie, querele, questie, sinistre interpretatie ofte swaericheyt nu ofte naemaels daer tegens te moveren, nemaer alles van puncte te puncte strictelicken ende volcomelicken t' obedieren, alsoo 'tselve redelick ende behoorlijk is. Gegeven binnen der stede van Ghendt onder onsen naeme ende zeghel in placcate hier aene vuyt doen hanghen, opten VIden dach Decembris in den jaere XV^e acht ende tseventich.

(Get.) GUILLE DE NASSAU.